

راضي علي الطهطاوي

ضحكة فوق وش الضيّ

أشعار بالعامية المصرية

الطبعة الأولى ٢٠١٨



بطاقة الكتاب

عنوان المؤلف : ضحكة فوق وش الضيّ
المؤلف : راضي علي الطهطاوي
التصنيف : أشعار بالعامية المصرية
رقم الإيداع : ٢٠١٨/١٣١٢٦
الترقيم الدولي : ٩٧٨-٩٧٧-٦٦٥٦-٣٧-٦
عدد الصفحات : ١٠٢ صفحة
رقم الإصدار الداخلي : ٢١٥
تاريخ الإصدار الداخلي : يونية ٢٠١٨ ، طبعة أولى
تصميم الغلاف والتنسيق : الشاعرة منى الغريب

جميع حقوق الطبع والنشر محفوظة للشاعر، ولا يحق
لأى دار نشر طبع ونشر وتوزيع الكتاب إلا بموافقة
كتابية وموثقة من الشاعر

دار النيل والفرات للنشر والتوزيع
ثورة مصرية تشرق إبداعاً على الوطن العربي

رئيس مجلس الإدارة
ناجي عبد المنعم

المدير العام
جابر الزهيري



دار
النيل والفرات
للنشر والتوزيع
أسسها الشاعر ناجي عبد المنعم
٢٠١٧

رخصة مزاولة مهنة: 58365 - سجل تجاري: - 2017 / 13242 - بطاقة ضريبية: 35-01-572
عضو عامل باتحاد الناشرين المصريين رقم 941 لسنة 2018
هاتف: 01011256943 - 01116202218 - 01202541192 - فاكس: 020554372901
alnilwaalfourat@gmail.com alnilwaalfourat
الناشر الرئيسي: د.م.ع. محافظة الشرقية - العاشر من رمضان - مجاورة 13 - أمام سنتر الم3 - منار 304
د.م.ع. محافظة المنيا - أبو قرقاص - شرق النخلة - خلف محطة السكة الحديد - هاتف 086214428
د.م.ع. محافظة القليوبية - مركز طوخ - إسماعى - هاتف 0132424735

الإهداء

إلى: روح أبي " رحمه الله " .. وإلى أُمي " حفظها الله "

إلى: زوجتي وأبنائي

إلى: أخوتي .. وأقاربي .. وأصدقائي

إلى : زملائي .. ومعارفي .. وجيراني

إلى : أساتذتي ... وتلاميذي

راضي على الطهطاوي

أحمد ومينا

إنت أحمد ولّا مينا
هيّه تفرق عندي إيه؟!
كلنا راكبين سفينه
وحلمنا باصين عليه
لمّا واحد يبكي فينا
كلنا بنمسح عينية
مش بيفرق عندي اسمك
ولّا دينك إيه يكون
مش بيفرق عندي رسمك
ولّا شكلك.. أي لون
كلنا من جنس آدم
أصلنا صلصال وطنين
إنت مصري زيّ زيّك

نبقى ليه متفرقين؟!
كنت غربي أو جنوبي
أو صعيدي سيناوي نوبي
خير بلدنا دي علينا
نفس توبك هو توبي
اللي خالق رب واحد
هو رازق للجميع
قلبنا لو يبقى جاحد
نلقى كل الخير يضيع
الحياه فيها اختلاف
والبشر متنوعين
بالتسامح وانتلاف
نلقى نور الله معين
قلبك انت يكون عليا
وحضني ليك مليون عمار
بين إيديك وبين إيديا



تطلع الشمس بنهار
اسألوا نقش الزمان
واللي ناسي فكروه
دا الوطن حزن الأمان
ليه يا ناس بتعكروه
أنت أحمد ولّا مينا
هيّه تفرق عندي إيه؟!!

.....

الله الله يا بلادي

الله الله يا بلادي
أنا شايف صبحك بينادي
والفرحه بترقص على نغمك
وجناينك طارحه عبير نادي
الله الله على نيلك
والقلب اتشعبط في نخيلك
وعيون المولى بترعاكي
والحب معطر مناديلك
الله على شمسك وشبابك
والحضرن بيجمع أحبابك
مرسومه الضحكه على خدودك
والورد مفتّح على بابك
الله على شقة أنوارك

من كل العالم زوّارك
وقصورك تعلا بحضارتها
وإيدين بتلون أسوارك
الله على ابنك وشهيدك
باع روحه عشائك جاب عيدك
والمسك أهو فايح من قبره
واهو دمه بينبض فى وريدك
الله ع الجيش وتحريرك
حافظ على عهدك ومسيرك
وعرقنا هيطرح بساتين
مصانعنا هاتغزل فى حريرك
الله ع الشعب ومتجمّع
والصوت اهو باسمك بيسمّع
الشعب وجيشك إيد واحده
وقلوبنا بتهتف بتدمّع
الله على حاضرك وماضيكى

والروح بتعلم تراضيكى
والجسم اتحنّى بلامحك
وكفايه قبورنا ف أراضيكى
الله على بكره وأزهاره
والطير بيغرّد في نهاره
والشمس بتفرد ضفايرها
والصحرا بتحضن أنهاره
الله على ليالك وسماه
وهالك طالع بمناه
والنجم بيكتب على ورقك
والبدر بيعزف في غناه
الله الله يا بلادي
أنا شايف صبحك بينادي
والفرحه بترقص على نعمك
وجناينك طارحه عبير نادي

ابني الغالي

إنت يا ولدي

ضنايا وسندي

ريحتي ونفسي وزهر ورودي

خط بياني ف رسم وجودي

زينتي ف عيلتي

قلعي وضلعي و نصبة عودي

لمّا معايا الحيل يتهد

انت النسمة ف زمة حرّى

بسمة بريئة ف شطّي وبرّي

أيوه يا شبهي واسمي وصورتي

إنت الثمرة الطالعة ف بورتتي

حضن فاضليّ... ضحكة ضليّ



لو أحزاني ف يوم تتشد
عارف لما بتبكي يا ابني
كل هموم الدنيا تصيبني
موجة تاخذني وموجة تجيبني
ودمع عيوني بيملا الخد
إنت يا ولدي
بصمة ذاتي بعد مماتي
حبل الذكري وسر جيناتي
كنز حصادي و جمع نتاجي
إنت الهالة ف درة تاجي
أيدي دراعي....الفرع بتاعي
لمّا بيدبل...بيك يتمد
أيوه باقيسك .. شبر وكفة
إمتي هتبقى عريس ف الزفة

دا أنت فصيلة دمك مني
إنت كماله عمري وسني
برعم حلمي وفرخ العش
ضحك الوش
وبكره الطارح
المتفتح بربيع غد
إنت الشمعة ف عتمة ليلي
إنت الكتف ف رفعة شيلي
إنت عصائتي ف سنده ميلي
صوتك ونسي ف كل سكوني
مهما يا ضلمة شديدة تكوني
ابني حبيبي
شمس الدنيا وضى عيوني
لما طريق الشوف يتسد

لَمَّا الْعَمْرُ بِيَبْقَى جَفَافٌ
أَنْتَ يَا ابْنِي هَتَصْبِحُ نَهْرِي
لَمَّا بَاعُوزٌ لِلْبَرْدِ لِحَافٌ
أَنْتَ دَفَايَا وَسَنْدِي وَضَهْرِي
مَهْمَا النَّاسُ مَشْغُولُهُ بِحَالِهَا
وَلَا الدُّنْيَا تَشُدُّ رِحَالِهَا
ابْنِي مَا عَمْرُهُ يَسِيبُنِي لَحْدُ
نَفْسِي أَسِيبُ الدُّنْيَا عِمَارُ
أَيُّوهُ عَشَانُكَ
طَعْمُ اللَّقْمَةِ فِ جَوْفِي مَرَارُ
لَوْ طِيفَ شَانُكَ
عَايِزُ تَعْرِفُ يَا ابْنِي غِلَاوَتُكَ
أَصْبِرْ لَمَّا هَتَصْبِحُ أَبُ
مَنْ غَيْرِ ابْنِ

الدنيا يا ناس ازای تتحب؟!!!

بص يا ابني في كل ملامحك

نبضك.. ضغطك.. سكر.. ملحك

رايحة تقولك

إن غلاوتك

فاقت كل حدود العد

.....

مصر انتى

مصر انتى.. يا ضي شمسي

قبل بكره .. كنتي أمسي

يا حبيبتي ونبض همسي ..

إنتي شريان الوجود

مصر إنتى .. يا شروقي

جاري دمك .. بين عروقي

كون بيفرح لو تروقي

تطرح الدنيا الورود

مصر إنتى .. يا حناني

طير معشش.. ف البناني

باعترف إني أناني

عشقى ليكى ماليه حدود

مصر انتي .. يا ابتهاجي
مهما هابعد .. بكره هاجي
إنتي دربي .. وانتهاجي ..
وضحكة القلب الودود
مصر انتي .. احتوائي
خط سيرك .. استوائي
و اللي يمشي التوائي
يلقى حضنك فيه سدود
مصر انتي .. يا مليحة
كلمة بنقولها .. صريحة
لو تكوني ف يوم جريحة
كلنا نلبي الردود
مصر انتي .. يا بنت نيلى
فوق حمولك .. ليه تشيلي؟!

أسندك لو يوم تميلي
وكلنا نصبح جنود
مصر إنتي .. كنيسة جامع
إن ناديتي .. قلبي سامع
وان حزننتي قلبي دامع
دم أحمر ع الخدود

.....

صباح الخير

على المدنه

صباح الخير على الأجراس

صباح شمّسك مع نيلك

تاريخ أهرام يغنيك

صباح بسّام بضحك الورد متعطّر

صباح رسّام سماكى بفرحة بتمطرّ

ونبض القلب يدعيك

صباح الخير على أسودك

على جنودك ... على حدودك عيون حراس

صباح الخير مع النسمة على الفلاح

في أحلى شروق

صباح الخير مع البسمه على الملاح

راضي علي الطهطاوي

وموج البحر بُكره يروق

يا كلمة حب فى قلوبنا .. يا تاج الراس

يا نبع الضيّ في الدنيا .. وضوء نبراس

صباح الخير على برعم

ببيتعلم حروف اسمه

ويتهجّى حروف اسمك على الكراس

صباح الخير على المدنه

صباح الخير على الأجراس

.....

أسمر وجميل

أسمر وجميل .. فوق شط النيل

يضحك ويميل .. زي الأزهار

والشمس الحلوة تغيله

ماشي وسرحان .. يكتب ألحان

الوقت أهو حان .. يعزف مزاويك

بالحب هترقص مناديله

وشمال ويمين .. يسأل أنا مين

أشواق وحنين .. يهجر ويروح

والعين ف الننى دا هتشيله

يبعد ويغيب .. يفضل دا حبيب

والحلم قريب .. مهما يسافر

هنشد رحالنا وهنجيله

دايب أنا فيه .. والشوق يخفيه
طاب ليه أجافيه؟! .. دا حبيب ولهان
على خط غرام أنا هامشيله
كالمح وداب .. والهجر عذاب
إحساس كداب .. يرجع ملهوف
والدمع معايا بيحكيه
طيب ورقيق .. كالبدر بريق
ف العشق غريق .. هايم فى غرام
والقلب المخلص يدعيه

.....

إرسميني

إرسميني جوه قلبك
زى ضحكة تكون ورود
زى نظره ف كون شروود
تمسح الصمت اللي عشعش
جوه أطياف القيود
ارسميني فوق جبينك
لمسه بتداوى الجراح
شمس بتشق البراح
اندهيلي أبقى فارس
صوته بيفك السراح
اكتبيني شعر حرّ
احفريني نيل يمرّ

شهدي يمحى كل مرّ
نروي بيه لهفة غيطانك
حلم بينادي الشجر
غصن بيضلل عليكي
انقشيني بألف لون
فوق حجر
يبقى كحل رموش عنيكي
قيدي من خذك شموعي
امسحي بإيدك دموعي
لملمي بحضنك ضلوعي
عند موجك
مش هتلقى غير قلوعي
اندهيلي لو بعيدك
أبقى غنوه تكون نشيدك

ارسميني

طير يغرد لك برئ

عاش يرفرف فوق قصورك

في السما مخلص جرئ

موته لأجل تعيش عصورك

ارسميني

زى ما قلبك يريد

دا أنتي قلبك لسه ظاهر

دمي فاير فى الوريد

مهما يبهرت يبقى ظاهر

ارسميني

بدر بيلفلف في كونك

نسمه بتعني ف سكونك

عش مبني من غصونك

عين بتحرسك حصونك

روح شهيد ضحّت تصونك

ارسميني

نهر نيل شق الجفاف

حضر دافي للي خاف

اغزليني

توب لبردك أو لحاف

شوفي قلبي اللي روحه ليكي حبّت

لما رجليه فوق ترابك مرة دبّت

رغم موته جه ونبتت

حتى لو كان أعمى شاف

هاوي حبك مهما تبقى اللقمة حاف

نفسه يلقي ف كل لحظة

سر حبك اكتشاف

ارسمي طيف مسافر
مكوي من شوق الحنين
سهم حبك فينا حافر
هجر بيزيد الأنين
ارسميني
ريشه ف ايد فنان وخذ
الحروف بتبوس إيديه
أحلى عيشه
بر آمن أعلى شط
مركبك ترسى عليه
ارسميني
ارسميني جوه قلبك
ضحكه بتداوي الجراح

.....

بنت حوا

ف الحقيقة بنت حوا

قلبها زى الملاك

لو تحبك يبقى بختك

صعب أيوا تعيش بلاك

بس لو كرهت جنابك

ابقى وسّع لنا بابك

الى مش يلحق جنازتك

يجى يستقبل عزاك

بنت حوا شهد صافى

قلبها أبيض يا بيه

لمّا يعشق أو يصافى

راح يشيلك بين عينيه

نبيع م الرقه وحنان
حضن يدليك أمان
بس لمّا بيجي يزعل
مين يا ناس يقدر عليه؟!
بنت حوا مش ضحيه
أو فريسة للذئاب
كنز مليون بالمشاعر
لمّا دنيا تبقى غاب
مش مبالغة دى حقيقة
دوول ملايكة يا ناس رقيقة
لمّا دمعة منها تنزل
يبقى كل الكون عذاب
بنت حوا ... نور ونار
منها دايمًا خلى بالك

ف الوجود سر العمار

دنيئك مع رأس مالك

كل روحها هيه فيك

والنصيحة ديّه ليك

لمّا أنت راح تهينها

ابقى اصبر ع اللى جالك

عُمر حوا ما تبقى عالّة

مش مجرد جنس عادى

كل ثانيه بألف حالة

لو بتمكر قول يا هادى

ولمّا ترتاح للحنين

قلبها القاسى يلين

يبقى ملبن بالكريمة

يبقى أطرى م الزبادى

اللى يكره بنت حوا
يبقى مش إنسان أكيد
هى بستان المحبة
بين إيديها الخير يزيد
الحياه هما غصونها
والأصيل دايما يصونها
فوق جبينها ألف تاج
مش جوارى أو عبيد

.....

الله محبه

والحب للمؤمن شعار

الحب لما يبقى باين

للبشر ينشر ضياه

والسماحة تفوح جناين

للقلوب نبض الحياه

نلقى حضن الكون ده دافي

تقلب الضلمه لنهار

حُب لو غاب من قلوبنا

تبقى غابه وفيها دوبنا

قلب لو ضاع حب منه

راح يعجز قبل سنه

مهما كان المال فى ايده

راح يعيش الجنه نار
لَمَّا بينا الحب يطرح
راح يحلّي أى مطرح
والعيون تفرح تغني
يملا كل الكون ثمار
حبنا شمس و عمار
سر ضحكه ف القلوب
عشقه ما يعرف هروب
ألف ورده
للى أخلص ف المودة
واللى سايح كل لون
عاش يغرد جوه كون
حب وطنه ... صان ترابه
عمره ما عكر شرابه

لَمَّا تَكَرَّهَ أَنْتَ أَخَوَكَ
تَلْقَى كُلَّ الدُّنْيَا شَوْكَ
تَلْقَى كُلَّ النَّاسِ سَابُوكَ
تَلْقَى طَعْمَ الدُّنْيَا مَرًّا.. اغْتِرَابَ
تَبْقَى لِلْعَطْشَانِ سَرَابَ
أَلْفَ وَرْدَةٍ
لِلَّيْ عَشْعَشَ جَنْبَ طَيْرِهِ
مَا مَنَعَشَى حَدَّ خَيْرِهِ
حُبَّ غَيْرِهِ وَأَهْلَ دَارِهِ
أَوْ مَاخَانَشَى فَمَرَّ جَارِهِ
أَلْفَ وَرْدَةٍ لِلْقُلُوبِ
الَّتِي لَوْ عَشَقْتَ تَدُوبُ
الَّتِي بَتَحَبُّ بِصَحِيحٍ
فِيهَا بِلَسْمٍ لِلْجَرِيحِ

صامده ما اهتزت لريح

للوداد دايماً تصون

طاهره ما تعرف تخون

أو تضرّ

جّوا منها الخير يسرّ

لَمَّا يَبْقَى بَيْنَا بُغْضٌ

وَلَا تَار

لما نكره بعض عار

الله محبه

والحب للمؤمن شعار

.....

بجك لذاتك

بجك لذاتك .. ونحكي ف ميزاتك
باحبك جناين بهيجة بطرحك
واحبك مشاعر وهيجة بجرحك
فى صيفى وربيعى .. رايق .. منكد
دا حبك طبيعى حقايق مؤكد
باحبك غناوى تخربش ف قلبي
ومهما شعورك نحوي دا سلمي
زايد وناقص وجزئي وكلي
مسبب وراقص وجنتل دوهلي
وصرخة زعيقك وهمسة قولاتك
وعاشقك بشوقي في مجمل حالاتك
باحبك بشوكك واحبك بعبك

باحبك بزهرك .. جفافك ونهرك
وحافظ نشيدك وسرك وجهرك
باحبك زيادة .. يقيني وعبادة
عاشق بلهفة وشوق واعتياد
واحبك وراثته بعلم ودراسة
واحبك هواية وغواية وعناد
بحبك تميز واحبك تحيز واحبك حياد
ترمس.. بليلة .. ونابت .. وعجة
يا فايقة الحلاية
قصايدى القليلة دابت برقة
وعايقة ف ملاية
بحبك كحایل فى رمش الصبیه
وعمالی خاطر
وفیکى بحایل یا صاده وأبیه وغالبه المخاطر

باحبك كنيسة وجامع فى حيطة
يا أمى الونيسة نسيجنا بخيطة
بحبك ومرضى يا أرضى وعرضى
وعرضى وطولى
رمز التلاحم بجيشنا البطولى
باحبك حضارة توشوش تاريخ
وزرع ونضارة ما تعرف تشيخ
وراسية ورزينة يا أم البلاد
وقاسية وحزينة فى لحظة بعاد
سارح مركز فرايح جرايح
مسامحه مخاصمة
مسنود معكز وضيقة وبرايح
وداعمة وخاصمة
حك دا قيمة يا خصبة وعقيمة

يا صمت وجهارة يا عفة وطهارة

وآية الأمومة

بتظهر فى حبّك

باحبك بشوكك واحبك بعباك

يا حارة وزقاق وشارع فسيح

وجبنة ورقاق .. وسمنك يسيح

يا طربوش وعمّة وأزهر ودير

ورائتك فى قمة تحلق كطير

باحبك غلاسة وجد وهزار

متيم كصوفى مرّيم فى زار

باحبك بشاير فى وش البرئ

ورمز الأشاير فى حكمة جري

هادية بسهوة وبحرك ممّوج

سادة يا قهوة وسكر محوّج

وفلاح مكافح .. فى جَوَّه اللى لافح

بيبدر فى حلمك ويزرع فى سبلك

باحبك بشوكك واحبك بعبك

باحبك فى طبيبتك يا قسمة ونصيبى

وبافخر بهيبتك وأرفض تشيبي

يا ضحكة سواقى تروى الجفاف

ومريم يا عدرا يا طهر العفاف

ونقش وتاتوه .. ومش وجاتوه

وخضرة صحارى بتحضن فى جبلك

باحبك بشوكك واحبك بعبك

باحبك بشوكك واحبك بعبك

.....

عيشى حياتك

شقى طريقك .. عيشى حياتك

أنا مش ليكى

انتى بريئه وقلبك طيب

وانا مش هاقدر ألع ببيكى

أيوه بحبك

بس ظروف الوقت الحالى

قاسية عليه ومش سامحالى

كلمه بقولها غصبن عني

ليه تستنى ؟!

جاتك فرصه .. عيشى .. اتھنى

رُوحى مسامحك

قلبي مخلي الذكرى ملامحك

وهافضل عمري أفكر فيكي

شقي طريقك .. عيشي حياتك

أنا مش ليكي

انتي بريئه وقلبك طيب

وانا مش هاقدر ألعب بيكي

عيشي حياتك

أيوه بقولها بشكل صريح

رغم الشوق والقسوة ف بُعدك

رغم عذابي حبيبتي أنا بعدك

يمكن يبقى البعد مريح

عيشي حياتك.....قلبي داعيلك

اللي نصيبك يعرف قيمتك

وجوه عيونه حبيبتي يشيلك

ومهما هنبعد عن بعضينا

عمر القلب مايبقى ناسيكي

شقي طريقك .. عيشي حياتك

أنا مش ليكي

انتي بريئه وقلبك طيب

وانا مش هاقدر ألع ببيكي

.....

امتى بيبكى الشاعر !؟

لمّا يشوف ع الغصن جفاف

ولّا عيون فى الضىّ تخاف

أو انسان بيدارى العُوزة

كل طموحه اللقمة الحاف

كل طموحه يجيب كرتونة

تبقى ف عز البرد لحاف

لمّا يشوف الدمعة

ف وش يتيم .. بتسيل ع الخد

تعرف إمتى بيبكى الشاعر !؟

لمّا الألوان تبقى مزيج

ولّا القطه لمّا يعاكس حد ولادها

تجرى عليه تصرخ وتهيج

لَمَّا يَلْقَى الحلم بتاعه

باعه .. بعيد

والإيد مش قادرة إليه تتمد

وكل ما يرجع يحلم تانى

يلقى طريق الحلم اتسد

تعرف إمتى بيبكي الشاعر.... !؟

لَمَّا المطره تهاجر غيطه

ولَّا الريح بتهزهز حيطه

لَمَّا يَلْقَى غدر حبيبه

ولا المعنى يتوه ويسيبه

بعد ما حبل العشق اتشد

تعرف إمتى بيبكي الشاعر.... !؟

لَمَّا يشوف الضحكة مخيفه

ولَّا المعنى ف بطن الشاعر

يبقى مجرد كلمة سخيّة

تاht جوه عيون الضلّة ف وقت الجد

تعرف إمتى بيبكي الشاعر.... ؟!

لما يشوف ف وشوش حرمان

أو أطفال مش لاقيه أمان

لمّا لذكرى الماضي يحنّ

أو من كتر جروحه يننّ

يسأل فين أحبابنا زمان

لمّا يشوف العين حيرانه

حاسه بغربة وهم وكربه

حتى النجم ماهوش ونّاس

رغم الزحمة وكتر الناس

فاقت كل حدود العد

تعرف إمتى بيبكي الشاعر.... ؟!

لَمَّا الْبَحْرُ قَصَائِدَهُ تَجَفَّ

وَالْتَفْعِيلَةُ تَدُورُ وَتَلْفُ

لَمَّا الْبَدْرُ يَخَاصِمُ لَيْلَهُ

لَمَّا بِيَتَقَلُّ حَمْلُهُ وَشَيْلُهُ

وَلَا الْحَمْلُ يَزِيدُ عَنْ كَيْلِهِ

رَغْمُ ثَبَاتِهِ وَنَصْبَةِ عَوْدِهِ

رَغْمُ صَمُودِهِ

فَ لِحِظَةٍ ضَعْفُ

بِشْكَلٍ مَفَاجِئُ

زَى الصَّخْرِ يَا نَاسَ يَتَهَدُّ

تَعْرِفُ إِمْتَى بِيَبْكِي الشَّاعِرُ.... !؟

.....

تاج راسي

زوجتي حبيبتي .. صورتني وهيبتني

قصري العالي حرمني العالي

بتصون عرضي وتحفظ مالي

جوه القلب وكنز مصون

أم ولادي ... عشق ودادي

فرحة قلبي لينا تدادي

أيدها ف أيدي

يا شمعتي قيدي

أندة.....ستي

تقوللي يا سيدي

يا ضيّ حياتي ونور ف عيون

صاينة العشرة ما تعرف كشرة

حافضة ملامحي لما اتكلم
قبل ما اخش الباب بتسلم
ربي احفظها وبارك فيها
دى أجمل رزق معاي في الكون
عايشة معاي ع الحلوة ومرة
نعمة ربي وأجمل ذرة
فرع الأصل معاها امتد
أب و أم وسابع جد
جواه البيت الوردية وزينة
فاهمة ظروفى يا ناس ورزينة
بحر حنان يملا ويبصب
رغم الغيرة وكتر الحب
عمر ما ساءت بيًا ظنون
هى رفيقة عمري ودربي

هى شريكة فرحي وكربي

لو تزعل منى وتتنكد

بتقول قلبى يا ناس متأكد

إني حبيبته

وعمر غلاوتي عليه ماتهون

لو عطشان ضحكته الريّ

هى البلسم لو فيه أى

بتكلمني وتحملني

لمّا الدنيا معاي بتضلم

من نظرتها بتصبح ضيّ

ربى احفظها وبارك فيها

أجمل طيبة وقلب حنون

.....

عشوق العذارى

نجم القمر عالي
عشق العذارى جنون
رمشك شغل بالي
عاشق أنا المفتون
مالك كده ومالي؟!
إمتى تكونى حلالي
بيكى الفؤاد مسكون
يا غنوة فوق سطري
حنيّ عشان خاطري
دا الصبر لو جالي
أرقص على حبالي
أعزف كمان لحنك



تعلّا سما جبالي
تصبح عيداني غصون
تسرح على خدك
ليه البعاد شدك؟!
حضر الحنان ردك
ضيّ الهوى يلالي
قربك بيحلالي
يروي جفاف شوقي
تتمدّي في عروقي
آه لما بتروقي
بيلالي موالي
أشرب وتملالي
يهدي السهر ف عيون
بافتح شبابيكي واجري أناديكي

ميلي بقى تعالى
وزيدى في دلالي
ندي الحياة معنى
والكون دا يسمعنا
نملا فراغ خالي
تمحي الحقيقة ظنون
لو مرة بتسافر
شوقى أنا يعافر
يصعب عليك حالي
طيفك بعتهالي
ذكرى وأنا سارح
دا الشوق يا ناس جارح
صورتك ونس ف سكون
جوه الفؤاد غالي

كنزي وذهب مالي
مهما الشجر بيميل
يفضل هوانا أصيل
تعلا الشراع وتحط
والموجة فينا تسط
عُدَّالك وعُدَّالى
حبيبتي وغزالي
لا ف يوم هانتغير ... ولا قلب متحير
ولا عمره مرة يخون

.....

الزوج الهارب

عارفه ليه

أنا بابتعد عنك؟!

عارفه ليه

أنا باهرب منك؟!

نفسى أغيب وأروح وأسافر

لحن حياتنا نشاز متنافر

علشان لما بابص عليكي

عمر الكحل ما حف عنيكي

حتى سلامك أصبح عاده

نفسى أحس الشوق ف ايديكي

نفس الهدمه مافيش تغيير

دا انتى معاكى اللبس كتير



حابسہ ہدومک جوہ دولابک
لیہ مطفیہ ف عز شبابک؟!
نفسی آشوفک لابسہ تاییر
فین العطر وفین الريحہ؟!
نفس الفورمہ مع التسريحہ
نفسی ف ہمسہ وضحکہ ولمسہ
وکلمۃ حب معاکي صريحہ
نفسی معاکي أعیش واتدلّع
نفسی آشوف الضحکہ تسمّع
حتى لَمَّا بتبقى أجازہ
حاسس إني ف بيتنا جنازہ
رابطہ اشارب بصورہ غبیہ
قلبي معای م الغیظ بیولّع
نفس العادہ ونفس الأکل



نفس اللون ونفس الشكل
عارفه كمان أنا ليه ملّيت؟!
كاره حتى أشوف البيت
علشان حاجه مش معقوله
دايمًا جوه البيت مشغوله
لاويه ف بوزك بالتكشير
نافشه راسك زي الغوله
دوشه وزيطه ويّا الجاره
تحكى بسر البيت وتهاتي
صوتك جايب آخر الحاره
دايمًا تشكي تقولي حماتي
دايما ترغي.. تعيدي... تزيدي
بقك عمره مابلش فوله
نفسى ألاقى ف وشك بسمه

نفسى أشوفك وردده ونسمه

شايله حنانك بس لمين؟!!

فين مكياجك؟!!

اللى ماشفته ليّا سنين

عارفه ليه

أنا بابتعد عنك؟!!

عارفه ليه

أنا باهرب منك؟!!

عارفه ليه أنا شكلى حزين؟!!

علشان كل حياتنا روتين

.....

سلامات... سلامات

ع اللي حاضر و اللي غايب

واللي عاشق لينا دايب

واللي مشتاق للحبايب

و اللي حلمه معاه كبير

و اللي عايش واللى مات

سلامات... سلامات

ع اللي ماشى يا ناس يغني

و اللي سائل مرّة عني

و اللي هايم جوا فني

و اللي قلبي يا ناس يحبه

و اللي صان الذكريات

سلامات... سلامات



ع اللي قلبه يا ناس رقيق

و اللي مخلص كالشقيق

ضحكته لونها بريق

و اللي عازف سيمفونيه

و اللي عاشق صوت نجاة

سلامات سلامات

ع اللي سافر يوم بعيدنا

و اللي فرحه بيبقى عيدنا

و اللي كان ياخذ بايدنا

لو يشوفنا ف لحظة نبكي

تبقى عينه دمّاعات

سلامات .. سلامات

ع اللي صدره يا ناس فسيح

و اللي حضنه حنان مريح

بالكلام واضح صريح
لو يشوف الدنيا هاصت
يلزم الصمت وسكات
سلامات ... سلامات
ع اللي قانع و اللي راضي
والحروف وياه تراضي
لو يشوفني ف امتعاضي
يزرع البهجة ف طريقتنا
لما يصحى أو يبات
سلامات... سلامات
اللي صاين لي ودادي
و اللي دايمًا كان يدادي
و اللي لو نبعد ينادي
لما أغلط يوم فى حقه

بالسماح سكر نبات

سلاماتسلامات

سلامات من كل روحي

ع اللي بيداي ف جروحي

يا حمامه ليه تنوحى؟!!

مش بخاف من شمس بكره

ولاً باحزن ع اللي فات

سلامات..... سلامات

سلامات دا العمر فاني

امتى يرجع لينا تاني؟!!

ليه تقوللي كاني ماني

الحياة فيها العجايب

والكتاب مليون حاجات

سلامات ..سلامات

لو هتحب

ولا يمكن تصبح يوم عايش

وتحس الدنيا وحلاوتها

ولا تفرح مرة بغلاوتها

من غير ما تحب

ولا أى كلام يقدر يشفع

ولا نار الشوق ممكن تنفع

من غير ما تهب

دا القلب العايش وحداني

هيقول القسوة دى واخداني

ويدوق الغربة ومرارتها

واللوعة يجرب حرارتها

يحتار فيه طب

دا العايش وحده يا ناس ميّت

فى الحزن بيصحى وبيبيّت

والفكر بينحت فيه هّه

ودموع العين كدا على خده

هتسيل وتكب

لو قلبك يظهر إخلاصه

راح يلقى طريقه و خلاصه

وهيمسح جرحه ويسامح

والعفو هيركب خيل جامح

للماضى يجب

طاب امتى حبيبى

راح تيجى

ونقول يا مشاعر كدا هيجمى

ويتوه توقيتك فى ساعاتك

تفتحلى بلهفة دراعاتك

وتأخذنى ف عب

دا الفرع الناشف لو شافك

داق خفة دمك وخشافك

راح يطرح تانى ويخضر

وأكيد هيشب

لو قلبك يصفى ويبروق

الضلمه هتصبحله شروق

ويشوف الجنه وبساتينها

زيتونها المايل على تينها

والروح ترجعله وفيه تسرى

جواه وتدبّ

لو عمرك منك كدا فات

من غير ما تغني الهتافات

راح تلقى الحرمان وأنيته

يكويك التنهيد وسنينه

والحسرة تشوفها وندمها

تصرخ تندب

.....

صدقيني لو مشيت

عمري تاني ف يوم ما هارجع

مهما قلبي حن ليكي

مهما كان البعد يوجع

صدقيني ومش باهزر

يا ما ليكي سنين باحذر

يا ما صبرت عليكي كتير

ياما سامحت وعقلي كبير

لكن آخر مرة بقولها

عمري ما هدخل عشك تاني

لما أهاجر منه واطير

صدقيني

الحكاية هاتبقى جد

بين طريقنا هيبقى سد

لو تسيري ف نفس خطك

مش هترسى الموج بشطك

مش هسامح ... مش هصالح

مش هاقدر تانى حد

صدقينى

مش هاغير ف المبادئ

الخلاف دا لسه بادئ

احنا ممكن نحتويه

ليه بعادنا نمشى فيه؟!

اللبن أبيض وصافي

بس لحظة بيبقى حادى ء

صدقينى واسألى

لو هنبعد ايه يفيدك

لسه قلبي .. آه يريدك
بس لو تمشي ف عنادك
مش هتفرق هيه عندي
كنت جنبك أو بعيدك

.....

مسلم ومسيحي

متقولليش مسلم ومسيحي

متقولليش

متقولليش أبيض ولا أسود

متقولليش

قوللى ازاي هانعمّر نبني

قوللى ازاي ابنك مع ابني

يزرع خير... وسلام ومحبه

وجوه بلدنا الغالية نعيش

ربك بالي ف قلبك عالم

كنت بتكره ولا مسالم

خلّي الحب ياناس يجمعنا

خلّي الإيمان صورته ومعنى

علشان أي خلاف مايجيش

متقولليش أبيض ولا أسود

متقولليش

مايفرقش معاي أنا شكلك

وياريت تبعد عنى مشاكلك

املا ف قلبك خير وعمار

نلقى الحب طرح أزهار

تلقى الدنيا خير وتسامح

غير الحب ف قلبي مايفيش

متقولليش لا احنا ولا هما

شعب الحب دا أجمل أمه

لو طيف غادر مس بلادى

كلنا رايح يشيل ف الغُمه

متقولليش أبيض ولا أسود

متقوللش

قوللي ازای هنعمرّ نبني

قوللي ازای ابنك مع ابني

يزرع خيروسلام ومحبه

وجوه بلدنا نعیش

متقوللش مسلم ومسیحی

متقوللش

.....

علموني في الطفولة

علموني في الطفولة

إني حُب بلدنا نعمة

كنت مسلم أو مسيحي

لو كرهنا بعض نعمة

رضعوني في الطفولة

المحبة ومش سابونا

قالوا أبيض ولاً أسود

كلنا آدم أبونا

فهموني في الطفولة

إن حصن العين جفوني

عمر قلبي ما يبقى قاسي

مهما أهلي يا ناس جفوني

علموني فى الطفولة
وكنتم لسه يا دوب باخطي
قالوا مهما الموج بيعلا
إن مصر يا ناس دى شطني
علموني فى الطفولة
اللي خالق رب واحد
هو رازق للجميع
لوقلوبنا تروق و تصفى
الحياة تصبح ربيع
علموني فى الطفولة
الجبال رمل وحجارة
وابقى صاين عرض جاري
زي أختي كل جارة
حذروني فى الطفولة

من كلام يجرح يضرّ
لو زرعنا الخير بإيدنا
تطرح الأزهار تسرّ
درّسولي في المدارس
إن رب الكون محبة
والحياة فيها اختلاف
والشجر من أصل حبة
كل لون يدّي انتلاف
علموني في الطفولة
الحياة دي خُد وهات
واللي عاش وحده أناني
صورة واضحة م العاهات
علموني في الطفولة
كنت لسه يا دوب صَغِير

إنى مهما الدنيا تقسى
لسه فيها الخير كثير
علموني في الطفوله
إنى طول الكون وعرضه
التسامح دين وفرضه
وإن ستر الله علينا
هو سر الله في أرضه

.....

أنواع الشعراء

كل شاعر ليه جماله

تلقى بيض منهم وسود

اللي يكتب لنا حاله

واللي يوصف ف الورود

واللي تاخذ منه عبرة

بالتجارب ويّا خبرة

واللي عاشق للحدود

واللي حرفه ذوق وفن

واللي صوته بس زن

يملا كل الحته دود

واللي يكتب عن جروحك

قلبه حاسس نبض روحك

واللي هايم ف الوجود
و اللي لسه طفل بادئ
و اللي ماسك ف المبادئ
و اللي كاره للقيود
و اللي كاتب باحتراف
و اللي غاوى الانحراف
لليقين رافض يعود
و اللي سارق شعر غيره
و اللي مفهوم خط سيره
عاش يغازل ف الأسود
واللى متكرر وخامد
حتى كل كلامه جامد
زى أصوات البارود
واللي ملهم بالسليقة

واللي أفكاره طليقه
واللي عابر للحدود
واللي لابس ميت قناع
يخدعك بالإقتناع
ينشر السمّ وجحود
واللي عامّي فُصحى حر
و اللي زارع شوك ومر
طبعه تشعر فيه برود
واللي شايل همّ ناس
واللي انتاجه كناس
شعر عايش ف الجمود
حد مشهور بالأغاني
واللى عاش مغزول أناني
واللى مكتوبله الخلود

العمل نجاح

عملك يزينك وصورة كفاحك

ربك يعينك ويكبر نجاحك

طريق السعادة وصحة وإفادة

وحاجه بترفع في شأن المقام

عاطل هتندم... وتثقل حمولك

ودخلك هيعدم.. نتيجة خمولك

موكد وجايز هاتشحت وعائز

وتفضل يا سيدى تقاسي الآلام

جهدك وعزمك يزود نتاجك

وتبنى فى قصرك تزوق فى تاجك

وقرشك يصونك

يعلى ف حصونك

ويمنع ديونك .. وكلمة ملام

.....

مش هيفيدك قعد القهوة

وتقول بكره هتيجي وظيفة

عمر الانسان يجري بسهولة

واللي بيعرق إيداه نضيفة

....

فلوسه اللى جاته تلبي حاجاته

عيشة بكرامة و أحلى انسجام

تصنع وتزرع تجنى بإيدك

ما حدش يذك حبيبى يكيدك

تهني ولادك وتبني بلادك

وترفع جبينك بأجمل وسام

تواكل يهدك ويخطف شبابك

لفقرك يشدك ويقفل فى بابك
تفضي جيوبك وتكثر عيوبك
وتصبح معيشتك
فى وشك ضلام
كسلك يهزك فى لحظة صمودك
عملك يعزك ويثبت وجودك
وتملك قرارك وتبني فى دارك
وفرحك يغني بأحلى الكلام
تكافح وتشقى فدخلك يزيد
وتاكل وتشرب وتلبس جديد
بصبرك هاتقدر تحقق طموحك
وتلقى حياتك هاتصبح غرام
هتتعب وتغرق هتاخذ ميزاتك
وكله يقدر طموحك وذاتك

ورزقك يجيلك تنور في جيلك
تزهزه دروبك وتمشى لأمام
تهاجر .. تتاجر وتكسب .. تبيع
تسافر .. تعافر في صيف أو ربيع
وتقطف ثمارك وتنسى المتاعب
ويفضل فقير اللي قصّر ونام
عملك كفاحك وصورة نجاحك
وحاجه بترفع في شأن المقام

.....

خليك الجاي

جوه الحياة والكون

بطلّ تعيش سلبي

قلبك يساع قلبي

نلقى الوجود ساعنا

يبقى العطاء معنى

على حب يجمعنا

تنسانا أوجاعنا

تصبح دروبنا ضي

تحضن شمو سنا نهار

ضحكك في وشي دوا

مين غيرنا احنا سوى؟!

الكون دا لينا احتوى

ننصح لغافل غوى

لو قلب أخلص نوى
يبدر تقاوى الحب
يجنى بإيده ثمار
طبطب على المحتاج
إدي المكافح تاج
مجد الوطن إنتاج
تحلا الصور مونتاج
لا نلقى قلب حزين
ولا قيمته يوم تنهار
افتح ببيان للغير
واعزف غناك للطير
جدد خطاوي السير
رشرش عطور الخير
جامع بيحضن دير

قلب البشر يصفى
دنيانا تبقى عمار
امسح دموع الخد
قول للأمل يتشدّ
حبل الوداد يتمدّ
لو اليتيم متهدّ
اسند معاه ضهره
وابني يا "خضر" جدار

.....

أخويا

إنت يا أخويا

بعد العمر لأمى وأبويا

أوعى المال والقسمة تفرّق

أوعى بحور الجفوة تغرّق

أوعى مراتي ولّا مراتك

تشعل فتنة ما بينا تحرّق

كتفى ف كتفك سوا نتجمّع

قلبي لقبلك صافى ملمّع

لو يوم نزعل راح نتعاتب

وبلاش صوتنا لغيرنا يسمّع

علشان عضم التربه نبّرّه

بيتنا ما نكشف أبداً سره

نرعى السمعة الحلوة لابونا

لو نفشل سمعتنا تعرّهُ

لازم يفضل ضيفك ضيفي

ضلك ضلي وطيفك طيفي

بيا هاتدفي ف عز البرد

وتفضل ضلة ونسمة صيفي

فاكر أمك باختك وصّت

لحظة موتها شاورت بصّت

عايزه تقول أخواتكوا أمانة

بس الكلمة معاها اتقصّت

أنا جنبك سندك وجناحك

تنده ف العوزة تلاقيني

ده نجاحي هيكمل بنجاحك

ومؤكد فعلا ويقيني

خلي حبالنا تزيد متواصلة
يخسر بيت بعماد متفاصلة
عمر الدم ما يصبح ميه
مهما تكون زعلتنا دى حاصلة

.....

الجواز العرفي

الواد اللى اتجوز عرفي
بيخبّي جوازته عن أهله
وكان عروسته ما تستاهله
إيه بس الورقة هاتعملك؟!
لو يهرب أو حد ندهله
يا عبيطة دا جايلك يتسلى
ليه بس تعيشي في مذلة؟!
لو يهرب وتقولي حقوقي
هيقول دى عليّا بتتبلى
منك راح ياخذ كدا غرضه
وتعيشي مرارك من مرضه
و بتضحى كده ليه على نفسك?!!

مين غاصبك بس ومين فَرَضُهُ!!

ما تخلّى جوازتك كده جهر

لو عرفى يا دوب هتعيش شهر

وينشّف ريق اللي جابوكي

وتعيشي بالعار والقهر

الورقة العرفي دى إيه يعنى؟!

لو سابني الندل ف يوم باعني

ولا تنفع قربه ولا جراب

ولا حد معايا هيسمعني

ليه عايزة جوازتك تتخبّى؟!

لو كان بيحبك كده حبة

يعلنها جوازة رسمية

دى مراتى وقلبي ليها عبّى

وحقوقك ودى عُرضة تضيع

لو ناوى يبيعك ده وضيع

لو سابك أو يغدر بيكي

إيه ذنبه الطفل اللي رضيع؟!!

فرحانة بكلمة يقولهاك

وبيلمع ليكى ويزهاك

وبياخدك للجيزة العرفى

والسكة دى مليانة مهالك

.....

أحلى بوسة

أحلى بوسة معاً شايها

تعرفوا هياخذها مين؟!!

اللي من أحشائها نابت

اللي من دعوتها ثابت

اللي حبت واللى ربت

ولا كانت يوم تنن

مهما نقسى يا ناس تحن

لو شافتنى ف يوم حزين

تبكي لَمَّا عيونها دابت

أحلى بوسة تاني برضه

للى ربى واللى صان

واللي كان يعمل حصان

لجل ما اركب وابقى فارس

فينا كل الحب غارس

عمره يشقى يا ناس يكد

لَمَّا مرة الريح تشد

يحضن العشّ بجناحه

يبقى ضله ولينا حارس

بوسة تانية وبامتنان

للي سانداني بأمان

اللى مالية الكون عليا

ساكنة قلبي ونور عنيا

ربنا يسعد حياتها

شمعتي ونبع الحنان

ألف بوسة باحترام

للي علمني القراية

واللي علمني الحروف
اللي كان أستاذ طفولتي
في المراحل والصفوف
اللي درّس واللي علّم
واللي أخلص في الرسالة
لولا دور فضل المعلم
كنت هابقي من الحثالة
أحلى بوسة وبحرارة
تعرفوها لجل مين؟!
للي نيلها ف الوريد
عشقها جواى فريد
بوستي ليها فوق جينها
فوق ترابها و فوق سماها
اللي صانها كمان حماها

لو بعدت ف لحظة عنها

قلي بيشده الحنين

غير بلادي

جذر عمري وامتدادي

أدّى بوستى يا ناس لمين؟!

وبقيت نارس

فوق شط بحورك كذا طائر

فى ضباب العتمة..وجو الكتمة

وأنيّن الزوف المعزوف

على نعمة دقاته ف قلبي

بقى سلبى

وفرّدت جناحى

لجل ما اشد حبال الذكرى

نزلت دمة حزنى مطاير

وبقيت نارس

على شجرة حسنك متعلّق

من شوقي بارفرف وباحلق

وراسمك صورتك براويز

وكاتبك شعر التعاويذ
وانا رهن اشارتك لو قولتى
هاعجنك م الشهد فطاير
وبقيت نورس
مش لاقى نهاية لطريقك
والضيّ بيبهت في بريقك
وبيكتم نفسهُ وبيجرى
على نور القمرة الدبلانة
بتودع في الشهر الهجرى
والقلب اتشرّخ من وجعه
والحلم اتقسّم لشطاير
وبقيت نورس
فوق شط بحورك كده طاير

.....

اذكريني

اذكريني جُوه منك

لحن للناي الحزين

أو على الوش ابتسامة

تمحى للقلب الأنين

اذكريني خيط لغزلك

رَمْش عَيْن بالكحل غازلِك

رغم كل الناس دى جنبه

الْوَنَسْ يلقاه بقربك

جُوه روحه ف أعلى حته

من عيون الناس دى عازلك

من حنانه نهر جاري

يروى أغصانك حنين

اذكرينى

مش مجرد طيف وعابر

الحبيب ما يكون مكابر

قلبه أطرى م العجينة

العذول دايماً هاجينا

من جمالنا

جوه قلبه النار تهبّ

واحنا كالأشجار نشبّ

فرحنا دايماً يلالى

كالجرس يضرب رنين

اذكرينى

رَيّ للأرض الجفاف

ضَيّ لو عينك تخاف

سكة لو رجلك تخطّى

مركبك تنده لشطّي
نبض قلبي يكون مراجل
يصهر التلج اللي جامد
ينتعش شوقي اللي هامد
من لهيبه الموج بيهدا
والصخور لجلك تلين
اذكريني
غصن فوق صدرك تهادي
قلبي لبّي وما استخبّي
لو دلالك مرة نادى
يكون في ربحك
قلبي لو يصبح جريحك
طب قوليلي
راح تلاقى بعده مين؟!

التعريف بالشاعر

- الشاعر راضى على الطهطاوى
- سوهاج .طهطا ..عرب بخواج...مواليد ١٩٧٨
- ليسانس الآداب والتربية قسم اللغة الانجليزية
- دبلومة مهنية...دبلومة خاصة...باحث ماجستير
جامعة المنيا
- معلم أول أ ثانوى لغة انجليزية
- عضو نادى الأدب بطهطا
- صدر له ديوان / بكاء قصيدة (شعر فصحي)

محتوى الكتاب

م	القصيدة	م	القصيدة	م
١	بطاقة الكتاب	٢	١٧	الزوج الهارب
٢	الإهداء	٣	١٨	سلامات سلامات
٣	أحمد ومينا	٤	١٩	لو هتحب
٤	الله الله يابلادي	٧	٢٠	صدقيني لو مشيت
٥	ابني الغالي	١٠	٢١	مسلم ومسيحي
٦	مصر إنتي	١٥	٢٢	علموني فى الطفولة
٧	صباح الخير	١٨	٢٣	أنواع الشعراء
٨	أسمر وجميل	٢٠	٢٤	العمل نجاح
٩	ارسميني	٢٢	٢٥	خليك إيجابى
١٠	بنت حوا	٢٧	٢٦	أخويا
١١	الله محبة	٣١	٢٧	الجواز العرفي
١٢	بحبك لذاتك	٣٥	٢٨	أحلى بوسة
١٣	عيشي حياتك	٤٠	٢٩	وبقيت نورس
١٤	امتى بيبكى الشاعر	٤٣	٣٠	أذكريني
١٥	تاج راسي	٤٧	٣١	التعريف بالشاعر
١٦	عشق العذارى	٥٠	٣٢	محتوى الكتاب